



# ILIDŽA

INFORMATIVNI BILTEN OPĆINE ILIDŽA  
Ilidža • Februar 2015 • Broj 135



**OBILJEŽEN DAN NEZAVISNOSTI BiH**





# Svečanom sjednicom obilježen 1. mart -Dan nezavisnosti



Svečanom sjednicom-akademijom Općinskog vijeća Ilidža u Multimedijalnoj sali 27. februara 2015. obilježen je 1.mart, Dan nezavisnosti BiH.Uz prisustvo vijećnika Općinskog vijeća, izvršne vlasti, poslanika u Skupštini Kantona Sarajevo, te predstavnika društvenog, javnog, političkog, privrednog i vjerskog života općine Ilidža prigodan referat podnio je predsjedavajući Općinskog vijeća Ilidža Muhamed Omerović.

„Ovaj datum 1992. godine je zlatnim slovima upisan u hiljadugodišnjoj istoriji.Na referendumu održanom 1992. godine više od 66 posto građana BiH svih nacionalnosti odlučilo se za suverenu, nezavisnu, samostalnu i cjelovitu BiH, državu ravnopravnih naroda i građana. BiH je proglasila nezavisnost u svojim historijskim i međunarodno priznatim granicama. Mi ne bismo bili ono što smo, da smo tada u ime sumnjive sigurnosti izabrali potčinjavanje. Svaki narod ima svoju obećanu zemlju, naša obećana zemlja je Bosna i Hercegovina i pozivam vas da se za nju izborimo“ rekao je, između ostalog Omerović.

On je izjavio da se od referendumu 1992. godine odigralo više događaja, dobrih i loših, više borbi, više zločina, više izdajstava i herojstava, više života i umiranja, nego u bilo koja tri vijeka naše historije.

„Mi nismo sretna generacija, ali možemo biti ponosna generacija. Zbog tog ogromnog stradanja jedno pitanje se neizbježno nameće, put borbe za slobodu, je li put jedini mogući izbor i da li je postojao ikakav drugi put da bi se izbjegao ovaj stravični sukob? „ pitao se Omerović.

On je dodao da je naš cilj BiH zemlja slobodnih ljudi, država u kojoj će se poštovati svaki čovjek i njegova prava, te svim građanima čestitao 1. mart Dan nezavisnosti.

Odgovore na pitanja predsjedavajućeg Muhameda Omerovića pokušao je dati prof. dr. Hasan Muratović, ekonomski stručnjak koji je bio sudionik historijskih događanja.

Prof. d. Muratović održao je historijski čas u kojem je opisao hronologiju sudbonosnih događanja i sudbonosnih odluka za BiH.

Načelnik Općine prof. dr. Senaid Memić kazao je da 1. mart trebao biti najznačajniji datum za BiH i da bi se trebao i mogao više obilježavati i vizuelno.

“Sve zemlje u svijetu imaju najveći praznik, a to je dan nezavisnosti.To bi trebao biti i najznačajniji praznik za nas koji volimo svoju domovinu. Svaka ulica trebala bi biti okićena zastavama, svaka prodavnica, firma, ustanova da svi vidimo i da poručimo svima u svijetu da slavimo praznik države. Bez obzira na teškoće mi ćemo se izboriti za našu domovinu.Svim građanima BiH i dijasporu upućujem iskrene čestitke „ poručio je načelnik Memić.

Kulturno- umjetnički doprinos svečanoj akademiji Općinskog vijeća Ilidža pružili su članovi Ansambla Sultan Mehmed Fatiha, Edin Čekić, Dženita Kožljak i Sead Derviškadić, kao i učenica Prve osnovne škole Mubina Suljić.

Delegacije Općine Ilidža položile su cvijeće na centralno spomen-obilježje.


**REDOVNA SJEDNICA OPĆINSKOG VIJEĆA**

## Donesena odluka o javnom komunalnom preduzeću „Ilidža“

Općinsko vijeće Ilidža na 25. redovnoj sjednici održanoj 26. februara 2015. donijelo je Odluku o osnivanja javnog komunalnog preduzeća. Preduzeće će poslovati pod nazivom Javno komunalno preduzeće „Ilidža“ društvo sa ograničenom odgovornošću. Sjedište firme bit će u ulici Trg branilaca Hrasnice bb. Za direktora je imenovan v.d. Sead Kečo. Vijeće je zaključkom verificovalo Odluku o osnivanju javnog komunalnog preduzeća koju je obradio Hamid Selimović iz Hadžića. Preduzeće se prvenstveno osniva zbog održivog upravljanja, zaštite i održavanja dodjeljene imovine u vlasništvu Općine Ilidža i efikasnije realizacije komunalnih i drugih djelatnosti od javnog interesa u nadležnosti općine Ilidža.

## Imenovana radna grupa za realizaciju „Sarajevo Film Festival“

Općinsko vijeće Ilidža donijelo je Odluku o obrazovanju radne grupe za realizaciju projekta „Sarajevo Film Festival“ na Ilidži. Ovom odlukom obrazuje se Radna grupa za realizaciju projekta „Sarajevo Film Festival“ na Ilidži, na Ljetnoj pozornici i u sastav se imenuju: Denis Muhović - pomoćnik općinskog načelnika za obrazovanje, kulturu, sport i informisanje, predsjednik, te članovi Suljo Alić, Ajla Milišić, Samir Lokvančić i Samir Avdić. Zadatak Radne grupe je da obavi sve potrebne aktivnosti kako bi se za građane općine Ilidža realizovao projekat projekcije filmova „Sarajevo film festivala“ 2015. godine na Ljetnoj pozornici Ilidža. Radna grupa će raditi na volonterskoj osnovi a stručne i administrativno-tehničke poslove za potrebe Radne grupe obavljat će Služba za obrazovanje, kulturu, sport i obrazovanje.

## Najzaslužnijim najveća priznanja 12. marta

Općinsko vijeće Ilidža na 25. redovnoj sjednici održanoj 26. februara u Multifunkcionalnoj sali Općine Ilidža donijelo je Odluku o dodjeli najvećih priznanja Općine za 2014. godinu. Husein Hasibović, dobit će Zlatnu pojedinačnu plaketu, a kolektivna zlatna ide u ruke Mrkulić Company (Hotel „Hollywood“) i Crnih labudova. Srebrnu plaketu dobit će firma „Braća Mujić“ d.o.o-“Export-Import“, kolektivna i Ibrahim Oputa, posthumno, pojedinačna. Zahvalnice će dobiti: Edin Bavčić, Meho Alić, Nafil Avdović, Mithat Karahasan i Resul Alić. Priznanja će im biti uručena 12. marta za Dan Općine Ilidža.



## Donesena Odluka o pristupanju izrade izmjene i dopune RP „Vlakovo“

Općinsko vijeće donijelo je Odluku o pristupanju izradi izmjena i dopuna Regulacionog plana „Vlakovo“. Zbog nedostatka grobnih mjesta preduzeće „Pokop“ uputilo je zahtjev Općini Ilidža, da im ustupi zemljište na Vlakovu, čija je eksproprijacija izvršena još 2010. godine. Ovom odlukom „Pokop“ će dobiti 3.300 slobodnih grobnih mjesta. Sredstva za izradu plana će obezbijediti Općina Ilidža putem krajnjeg investitora u iznosu od 7.500 KM. Nosilac pripreme plana je načelnik Općine Ilidža, a izrade Zavod za planiranje Kantona Sarajevo. Realizacija izgradnje nije pratila važeći provedbeno planski dokument, tako da je u dijelu koji se odnosi na padinu na istočnoj granici obuhvata uz glavnu prilaznu aleju, na planiranom zemljištu za izgradnju oproštajnog objekta sa kapelama, svećanim salama, krematorijem, upravom, pratećim sadržajima vezanim za garažiranje i servis voznog parka kao i prostor centralnog trga, izgrađena Aleja veterana sa novim grobnim poljima, na zemljištu u namjeni zaštitno zelenilo i kolumbariji započeta realizacija novih grobnih polja, i na prostoru planiranom za izgradnju prihvatnog objekta na ulazu u groblje danas realizovan rozarij.



## Izvještaj o radu i Program rada Pravobranilaštva Općine Ilidža

Vijeće je usvojilo Izvještaj o radu za 2014. godinu i Program rada za 2015. godinu Pravobranilaštva Općine Ilidža. U izvještajnom periodu Pravobranilaštvo je obavljalo poslove iz nadležnosti koje su utvrđene Zakonom i Odlukom o pravobranilaštvu kao i drugim zakonima u zastupanju u postupcima pravne zaštite imovine i imovinskih interesa pred sudovima u sudskim postupcima, organima uprave i u upravnim sporovima, davalo mišljenja vezano za dodjelu gradskog građevinskog zemljišta, potvrđivanje ugovora o kupoprodaji stanova na koje postoji stanarsko pravo, kao i u drugim predmetima u kojima je nadležno pravobranilaštvo za odlučivanje.

U programu rada za 2015. godinu Pravobranilaštvo će kontinuirano raditi na efikasnoj zaštiti imovine i imovinskih interesa Općine, te kroz saradnju sa drugim nadležnim organima i institucijama ubrzati realizaciju svih pokrenutih predmeta. U narednom periodu aktivnosti Pravobranilaštva Općine Ilidža biće usmjerene na poduzimanje mjera radi pravne zaštite imovine i imovinskih interesa Općine, afirmisanju svih vidova preventivne djelatnosti, kontinuirano praćenje pojava i problema vezanih za primjenu zakona u praksi i organizovanju radnih dogovora sa općinama i drugim organima radi postizanja boljih rezultata u zaštiti imovine Općine. Pored navedenog obavlaće i druge poslove koji su u nadležnosti Pravobranilaštva.

## Saglasnost za provođenje postupka dodjele koncesije firmi „Čolaktex“

Općinsko vijeće Ilidža je na 25. redovnoj sjednici održanoj 26. februara 2015. godine u skladu sa Zakonom o koncesijama, donijelo Odluku o davanju saglasnosti za provođenje postupka dodjele koncesije za eksploataciju dolomitnog krečnjaka na lokalitetu „Rudnik-Vinjage“ u Rakovici firmi d.o.o. „Čolaktex“, a koja se odnosi na proširenje eksploatacionog polja na kamenolomu „Rudnik-Vinjage“.

## Izvještaj o radu rada Jedinstvenog općinskog organa uprave, stručnih i posebnih službi

Općinsko vijeće usvojilo je Izvještaj o radu za 2014. godinu Jedinstvenog općinskog organa uprave, stručnih i posebnih službi i Izvještaj o upravnom rješavanju upravnih stvari u upravnom postupku za 2014. godinu. U izvještaju o radu istaknuto je da su aktivnosti općinskih organa bile usmjerene na realizaciju utvrđenih obaveza, zaključaka Vijeće i obavljanju drugih poslova koji su zakonom ili na drugi način stavljeni u njihovu nadležnost. Poslovi kantonalne uprave koji su zakonom preneseni na Općinskog načelnika i poslovi lokalne samouprave, iz samoupravnog djelokruga općine, obavljaju se u službama za upravu. Stručni i tehnički poslovi za potrebe Općinskog vijeća i načelnika obavljaju se u stručnim i posebnim službama. Organi uprave su u svim oblastima kontinuirano radili na sprovođenju utvrđene politike i neposrednom izvršavanju zakona, podzakonskih akata, drugih propisa i općih akata, rješavali u upravnim stvarima, vodili propisane evidencije i izdavali isprave, pružali pravnu pomoć u ostvarivanju i zaštiti prava građana, te obavljali druge stručne i upravne radnje. Posebna pažnja posvećena je razvojnim projektima, stvaranju uslova za otvaranje novih i dovršenje započetih projekata, kroz stalno praćenje stanja u pojedin oblastima. Aktivnosti službi odvijale su se u skladu sa ISO 14001:2004, u okviru čega su provedeni interni i eksterni auditi za preispitivanje provođenja ISO standarda. U protekloj godini, IFC (Internacional Finance Corporacion) članica grupe Svjetske banke i Općina Ilidža su uspješno proveli tri faze projekta regulatorne reforme „Projekat poboljšanja poslovnog okruženja u Općini Ilidža“ kojim su usvojene preporuke za pojednostavljenje i unapređenje administrativnih postupaka koje provode i primjenjuju organi općinske uprave.



## Saglasnost na Plan i Program održavanja, zaštite, rekonstrukcije i izgradnje lokalnih i nerazvrstanih cesta

Vijeće je donijelo zaključak o davanju saglasnosti na Plan i Program održavanja, zaštite, rekonstrukcije i izgradnje lokalnih i nerazvrstanih cesta na području općine Ilidža za 2015. godinu. Zakonom o cestama Federacije BiH uređen je pravni položaj javnih cesta, upravljanje, građenje, održavanje i ustupanje radova, zaštita cesta i uslovi odvijanja prometa na cestama, finansiranje kao i druga bitna pitanja značajna za općinu na nivou lokalnih i nerazvrstanih cesta. Odredbama Odluke o razvrstavanju vangradskih cesta na području Kantona Sarajevo utvrđene su lokalne ceste na području općine Ilidža. Sve ceste koje nisu razvrstane u jednu od kate-



gorija javnih cesta su nerazvrstane ceste i u nadležnosti su Općine. Ovim planom i programom utvrđen je obim, vrsta, vrijednost i dinamika izvođenja radova na održavanju, zaštiti, rekonstrukciji i izgradnji lokalnih i nerazvrstanih cesta u skladu s planiranim budžetskim sredstvima, a bazirano je na realnim potrebama normalnog funkcionisanja saobraćaja i na konsultacijama i prijedlozima organa mjesnih zajednica.

## Koordinacije boračkih udruženja obilježile 1. mart

Koordinacija boračkih udruženja i Općina Ilidža polaganjem cvijeća ispred centralnog spomen-obilježja na Ilidži obilježili u 1. mart Dan nezavisnosti. Učenjem Fatihe i minutom šutnje odali su počast poginulim šehidima i braniteljima BiH. Oko 100-tinjak ljudi sa ovog skupa, organizovanim autobusima posjetili su mezar prvog predsjednika BiH Alije Izetbegovića gdje je položeno cvijeće.



## Prijedlozi akata o regulisanju imovinsko-pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Hadžić Ismeta, Kuloglija Muje, Gagić Miralema, Bajrić Sejdalije, Čeković Zaima, Juković Zumrete, Šutalo Željka i Dijane, Dedić Mufida, Horo Osmana i Bašić Hamze. Usvojeni su i prijedlozi rješenja o rješavanju imovinsko-pravnih odnosa u svrhu legalizacije poslovnog objekata po zahtjevu Mujanović Jasmina i prijedlozi rješenja o dodjeli neizgrađenog građevinskog zemljišta u svrhu izgradnje stambeno-poslovnih objekata Maličević Adnanu, Ragipović Zijadu, Mirvić Rizahu, Ragipović Vasviji, Kadrispahić Nusretu, Omerspahić Lutviji, Bavčić Rasimu i Kalić Senadi.

## Imenovani novi predsjednici komisija

Na inicijativu OO SDA Ilidža, a na prijedlog Komisije za izbor, imenovanje i pitanja ravnopravnosti spolova, Općinsko vijeće je za predsjednika Komisije za obrazovanje, kulturu, fizičku kulturu i pitanja mladih imenovalo Nermina Muzura umjesto dosadašnjeg Denisa Muhovića zbog prestanka mandata, a za predsjednika Komisije za ljudska prava, predstavke i prijedloge imenovan je Amir Džafo umjesto Fikreta Prevljaka, također zbog prestanka mandata.



## I ove godine obradovani najstariji Ilidžanci

**N**ačelnik Općine Ilidža prof. dr. Senaid Memić i šef Službe za koordinaciju rada MZ Enes Čorbo upriličili su 9. februara, prijem za 30 osoba, Ilidžanaca, najstarijih stanovnika sa područja ove općine. Tom prilikom uručili su im novčane poklone u iznosu od 50 KM.

„Želim vam još puno godina da se susrećemo i ovaj mali gest samo je potvrda da niste zaboravljeni. Humanost naše općine se vidi kroz ovaj susret i brigu o vama. Izuzetna je čast danas biti sa vama. Mi cijenimo ono što ste vi uradili u toku svog radnog vijeka. Ovaj iznos po 50 KM za vas 1.519 je samo potvrda našeg odnosa prema vama. Nadam se da ćemo se i iduće godine vidjeti“ rekao je načelnik Memić. Fehim Čedić koji ima 82 godine zahvalio je načelniku na organiziranom susretu i novčanim sredstvima. „Ovaj prijem meni znači puno. Znači da nas naš načelnik cijeni i poštuje. Mnogo mu hvala“ kazao je Čedić. Enver Mrzić (97) također je imao riječi hvale na gest načelnika.

„On nas se sjeti svake godine u februaru i mnogo cjenim ovaj susret i riječi kojima nas obrađuje“ dodao je Mrzić.

## Načelnik obišao samostan časnih sestara Sveti Vinko

**N**ačelnik Općine Ilidža prof. dr. Senaid Memić posjetio je 10. februara Samostan časnih sestara Sveti Vinko na Stupu, te im uručio novčanu pomoć.

„Starim ljudima koji imaju više od 80 godina svake godine podijelimo novčanu pomoć po 50 KM, pa tako i osobama koje borave u ovom samostanu. Ovo je mali znak pažnje i izraz zahvalnosti na Vaš doprinos nekada našoj zajednici. Mi smo tu da služimo drugima. Ova posjeta pokazuje da trebamo da brinemo jedni o drugima. Ovo je mjesto pouke za sve i dobro je da ih imamo. Čestitam sestrama na svakom trudu i nadam se i budućoj dobroj saradnji“ izjavio je načelnik Memić, koji je obećao i donaciju kreveta i posteljine. Sestra Gabrijela zahvalila je načelniku na pomoći i njegovom razumjevanju za ovaj samostan.

U samostanu boravi 17 osoba koje imaju više od 80 godina.



## Sulji Goli dodijeljene mašine za pranje unutrašnjosti auta i tepiha

„Socio-ekonomsko osnaživanje žrtava mina i njihovih porodica kroz poslovnu obuku i stvaranje mogućnosti za zapošljavanje“, naziv je projekta koji realiziraju Arbeiter-Samariter-Bund (ASB)- Njemačka humanitarna organizacija i Općina Ilidža, a koji su potpisali još prošle godine. Predstavnici ASB i Općine Ilidža, 18. februara uručili su amputircu sa područja općine Ilidža, Sulji Goli, dvije mašine za pranje unutarnjih dijelova automobila i tepiha.

„Dodijela ovih mašina znači rješavanje pitanje egzistencije, ne samo mene već i mog sina koji je nezaposlen. Planiramo otvoriti praonicu i tako zarađivati za život, da se osjećamo kao društveno-korisni i da ne zavisimo ni od koga. Hvala Općini i ASB“ kazao nam je Suljo Golo. Projekat je u završnoj je fazi, a finansiraju ga Delegacija Evropske unije u BiH, organizacija Arbeiter-Samariter-Bund Deutschland (ASB) i Općina Ilidža. U ovom projektu učestvovalo je 14 žrtava od mina sa Ilidže. Do sad je bila dodjela stočnog fonda, četiri motokultivatora i kosačice. Ova lokalna zajednica je u pomenutom projektu učestvovala sa 15 posto finansijskih sredstava, odnosno 6.200 KM po korisniku.





## Služba Civilne zaštite obavila niz aktivnosti

U cilju preventivnih mjera zaštite od poplava Služba Civilne zaštite Općine Ilidža poduzela je niz aktivnosti.

Urađen je novi nasip u dužini od 135 metara na rijeci Zujevini u ulici Karamušići u MZ Osjek i prokop kanala dužine 80 metara u naselju Glavogodina.

Ispred Mujića mosta radi poboljšanja protočnosti potoka Trnava, u ulici Vlakovo ugrađena je cijev promjera 80 centimetara.

Zavod za javno zdravstvo Kantona Sarajevo izvršio je dezinfekciju i deratizaciju na svim poplavljenim objektima. Komisija za procjenu štete također je obavila svoj posao.



## Sajam meda i pčelinjih proizvoda

U organizaciji Udruženja pčelara „Behar“ Ilidža, od 16. do 20. februara 2015. godine u ulici Rustempašina na Ilidži održan je sajam meda, pčelinjih proizvoda i ljekobilja. Na sajmu je svoje pčelinje proizvode i ljekovito bilje izložilo deset izlagača iz cijele Bosne i Hercegovine.

„Sajam je izložbeno-prodajnog karaktera i namjera nam je da se i ubuduće održava i da postane tradicionalan. Ove godine su i tri štanda narodnih rukotvorina. Ovom prilikom želim da se zahvalim načelniku općine Ilidža prof. dr. Senaidu Memiću na podršci“, kazao je Hamed Čajić iz Udruženja „Behar“. Po završetku sajma izlagači će dio svojih proizvoda pokloniti u humanitarne svrhe. Ovo udruženje postoji od 2007. godine.



## Deminiranje Golog Brda

U Mjesnoj zajednici Vrelo Bosne, 26. februara 2015 godine počela je realizacija projekta deminiranja na lokalitetu Golo brdo kojim je obuhvaćeno područje od 130.000 kvadratnih metara. Projekat u vrijednosti od 160.000 KM udruženim sredstvima finansiraju Općina Ilidža i Međunarodni fond za deminiranje ITF. Izvođač radova je Udruženje za eliminaciju mina iz Sarajeva. Završetak radova planiran je za mjesec dana, a zavisit će od vremenskih prilika.





## Općina Ilidža provela tender

Općina Ilidža provela je proceduru i odabrala izvođača radova na izgradnji biciklističke staze. Za ovaj posao izabran je GP "Put" sa kojim bi ubrzo trebao biti potpisan ugovor. Staze će se graditi od Doma zdravlja Ilidža prema Hrasničkoj cesti, odnosno do dijela gdje su stali radovi na izgradnji ove ceste. Početak radova ovisi od vremenskih uvjeta, a prema tenderu rok za završetak poslova je 60 dana.



## Svečano otvorena ekspozitura Vakufske banke

Vakufska banka d. d. Sarajevo je 10. februara u općini Ilidža, na adresi Dr Mustafe Pintola 23 (zgrada hotela Hollywood) svečano otvorila ekspozituru Ilidža na novoj lokaciji.

Ovo je druga novootvorena poslovna jedinica Vakufske banke u 2015. godini.

"Općina Ilidža zauzima veoma značajno mjesto u Kantonu Sarajevo. Mnoge firme koje uspješno posluju imaju svoje sjedište u ovoj općini. Cilj nam je da svim klijentima ponudimo kvalitetne bankarske usluge domaće banke", rekao je Mirzet Ribić, direktor Vakufske banke. Direktor banke je istakao da će Vakufska banka nastaviti proaktivno djelovati u budućnosti i pozivao sve privrednike na proširenje i ojačavanje saradnje.

Načelnik Općine Ilidža prof. dr. Senaid Memić se obratio gostima rekavši da se raduje što vidi domaću banku da širi svoje poslovanje. Načelnik Memić je poželio uspješan početak na novoj lokaciji i uspješno poslovanje u općini Ilidža.

Vakufska banka širi poslovnu mrežu otvaranjem novih poslovnica. U 2015. godini je otvorena nova poslovna u Jajcu, ekspozitura Ilidža je u novom i modernijem prostoru, te ovim aktivnostima simbolično počinje kako stabilizacija tako i širenje mreže poslovnica i utvrđivanje i dalje jačanje pozicije Vakufske banke na tržištu. Tu su i atraktivni proizvodi, te akcija nenamjenskih i stambenih kredita koja traje do 30. juna 2015. godine, a elektronskim bankarstvom je banka uz klijente 24 sata svih 7 dana sedmično na usluzi. Radno vrijeme je od osam do 16 radnim danima a subotom od devet do 14. sati.

„Prema projektu planirano je da se biciklistička staza proteže od Hrasnice do Stupa, odakle je već ranije počela izgradnja biciklističke staze prema gradu. Za sada prema raspoloživim sredstvima na području Ilidže izgradit će se dionica od Doma zdravlja do onog dijela dokle je izgrađena Hrasnička cesta. Posao je procjenjen na 130.000 KM „, rečeno nam je u Službi za investicije i razvoj.

Biciklističke staze bit će dvosmjerne, a uz nju će ići pješačka staza te će se napraviti i dva parking, početni podest i odmaralište.

## Općina Ilidža promijenila odluku

Općina Ilidža promijenila je Odluku o visini naknade posebnih usluga u postupku sklapanja braka.

Kada se sklapanje braka odobri izvan službene općinske prostorije, na mjestima kao što su hoteli, restorani, budući bračni partneri su dužni platiti novčanu naknadu, u iznosu od 400,00KM, nova je Odluka Općine Ilidža.

Sklapanje braka u ovakvim slučajevima vrši se svakog dana u vremenu od 10,00-19,00 sati. Vlasnici ugostiteljskih objekata dužni su obezbjediti prikladnu prostoriju sa odgovarajućim uslovima za obavljanje svečanog čina sklapanje braka.

Budući bračni partneri koji žele da brak sklope u dane koji posebnim aktom Općinskog načelnika nisu utvrđeni kao dani u kojima se vrši sklapanje brakova u službenoj općinskoj prostoriji, tj. srijedom i subotom, mogu to zahtjevati isključivo u radne dane u vremenu od 10.00 do 18.00 sati uz plaćanje naknade u iznosu od 100KM.

Odobrenje da se sklapanje braka izvrši van službenih prostorija općine izdaje se u obliku rješenja na osnovu kojeg će budući bračni partneri izvršiti uplatu. Ukoliko budući bračni partneri povuku prijavu za sklapanje braka, mogu podneti zahtjev za povrat uplaćenog iznosa.

Inače, sklapanje braka u službenim prostorijama općine Ilidža, subotom i srijedom u Općini Ilidža je besplatno.







## Na „Kafi sa“ sa Almirom Mukačom

**G**ost sesije „Kafa sa“ u Obrazovno-raznodnom centru za mlade SPAJALICA 23. februara navečer bio je Almir Mukača, čovjek koji ima mnogo životnih prioriteta, projekata i vizija ali za sebe kaže da je jednostavno poljoprivrednik. Jedina razlika leži u tome što je Almir kao i cijeli njegov tim orijentisan na organsku proizvodnju isključivo domaćeg povrća. Almir u SPAJALICI govorio o zdravoj prehrani, organskoj proizvodnji i projektima poput „www.krompir.ba“ i „Zelenara“ koje uspješno vodi.

„Moja porodica se oduvijek bavila organskom proizvodnjom povrća, međutim mi nismo znali da se to tako zove, jer se taj pojam u Fojnici, kraju iz kojeg ja dolazim nije baš previše koristio. Nikada nismo koristili pesticide i hemijska gnojiva pri uzgoju našeg povrća jer smo proizvodili isključivo za vlastite potrebe i željeli smo da jedemo zdravu hranu. Ideja za pokretanje www.krompir.ba došla je jednog petka kada sam shvatio da treba prodavati organski krompir koji bih dostavljao na adresu i to prvenstveno prijateljima u Sarajevo. Shvatili smo da sve to trebamo upakovati i baš tada se rodila ideja za „Zelenaru“ tj. kutiju punu povrća. Našu „Zelenaru“ naručuju žene. Isporuka se radi i tri puta sedmično i to ponedjeljkom, srijedom i subotom i to u vrijeme kada to odgovara kupcu dok količina povrća zadovoljava jednosedmične potrebe za povrćem četveročlane porodice“ kazao je Almir Mukača.

Omladinski biznis poput www.krompir.ba idejni tvorcima su promovirali putem društvenih mreža jer su shvatili da je to najefiniji i najbrži kanal koji će ih dovesti do željene ciljne grupe. Prve isporuke su pokazale da je projekt uspio i da su ljudi bili zainteresirani za finalni proizvod tj „Zelenaru“ koju su željeli redovno u svom domu.

## Djeca Škole prijateljstva posjetila Vatrogasnu stanicu Stup

**D**jeca „Škole prijateljstva“ iz Obrazovno-raznodnog centra za mlade SPAJALICA u pratnji projektnih koordinatorica „Škole prijateljstva“ posjetili prostore vatrogasne stanice na Stupu u Sarajevu i upoznali se sa zanimanjem vatrogasca. Komandir druge čete Hajrudin Zahiragić je proveo mališane kroz vatrogasnu stanicu te ih upoznao sa vatrogasnom opremom. Djeca su bila oduševljena opremom koju su vidjeli i probali te vožnjom velikim vatrogasnim kamionom.

Poseban poklon za djecu bio je poklon vatrogasaca, u obliku radnog priručnika i bojanke prilagođene uzrastu grupe koja je danas posjetila vatrogasnu stanicu.



## Mirsad Sarajkić ponovo pronašao i vratio novčanik

**M**irsad Sarajkić uposlenik Općine Ilidža pronašao je novčanik 11. februara u šalter sali. Kako su u novčaniku bili i lični dokumenti poštenu nalazač Mirsad Sarajkić nije oklevao ni sekund i odmah je pronašao vlasnicu Raziju Neretljak i vratio joj novčanik. U novčaniku je bilo 70 KM i lični dokumenti.

Novac koji je pronašao nije veliki, ipak tvrdi da mu je drago da je novčanik vratio i da nije imao moralnu dilemu da li da to uradi.

„Šta će meni tuđi novac i dokumenti? Ne smatram da sam učinio nešto posebno. To je bio normalan i human gest. Verujem u poštenje i nadam se da će moj primjer u budućnosti biti inspiracija i drugima kako treba postupiti u ovakvim ili sličnim situacijama. Inače, nije mi ovo prvi put. Do sada sam pronalazio novčanike, mobitele najmanje šest sam novčanika vratio i ponosan sam na to“ skromno kaže Mirsad Sarajkić.

„Hvala Mirsadu mnogo. Njegov gest mi je vratio vjeru da ima dobrih ljudi“ rekla je Razija Neretljak.



## Hobby Art Centar učio osnove Osme osnovne praviti dekupaž

Osmo osnovna škola "Amer Čenanović" bila je domaćin radionice "U susret proljeću i osmom martu" koja se održala 23. februara u organizaciji Hobby Art Centra. Učenici trećeg razreda koji imaju afiniteta prema likovnoj umjetnosti bili su učesnici ove radionice na kojoj se učila tehnika dekupaža.

"Ljekovitost likovnog izražavanja i kreativnosti je davno prepoznata. Kroz interakciju s likovnim i kreativnim materijalima mališani se opuštaju i druže razvijaju samospoznaju, te time otkrivaju snagu i potencijal u sebi. Kako nam ubrzo dolazi osmi mart ovi učenici prave poklone svojim najmilijim, mamama, nanama, bakama, strinama, učiteljicama. U današnje vrijeme djeca su opsjednuta, mobitelima, kompjuterima, virtualnim životom i video igricama. Mi želimo u djeci probuditi ono što smo mi nekada bili i što smo imali. Želimo ih naučiti da sami nešto naprave i poklone. Nadamo se da će se sviđeti pokloni onima kojima su namjenjeni" rekla nam je



Vildana Brčić, prof. likovne umjetnosti i jedna od kordinatorica Hobby Art Centra.

Inače Hobby Art Centar održavao je veliki broj radionica širom BiH koje su bile i prodajnog karaktera, a sredstva su uplaćivali za bolesne, ugrožene od poplava i one kojima su smatrali da je potrebno. Svi zainteresovani kreativci, hobisti koji žele da se druže i nauče nešto o umjetnosti mogu se javiti putem telefona 033 651-058, Kolodvorska 3 ili putem FB stranice hobby.ba.

## Prisjetimo se malo: Konjičke trke

Odgovornost plemena pasmina konja, kao i konjske trke imali su višestoljetnu tradiciju u BiH. Na početku austrougarske okupacije Bosne u vremenu od 1881-1882. austrougarski oficir slikar amater Eduard Loidolt naslikao je akvarel na kojem je prikazano kako starac Hadžijamaković obučava jedno kasačko grlo na svom imanju u Sarajevskom polju. Trke su izazivale veliko zanimanje građana, a prisustvovao im je veliki broj uglednih vladinih činovnika, barona, gospođa, begova i aga. Godine 1895. održane su prve konjičke trke na novosagrađenom hipodromu u Butmiru. Tradicija održavanja trka ostala je do danas. O utiscima sa ovakvih trka u Butmiru pisani su opširni izvještaji i predstavljeni pobjednici.

Jedan izvještaj je izgledao ovako "Prije svega valja reći da je pripeklo, sve curi niz obraze, plivaš u znoju. Uz sve to vriju živahni razgovori u ukusnim vagonima kupališnog vlaka



koji juri kroz ova četiri dana utrke ravno dvadest puta na Ilidžu i toliko puta natrag. Uzdrži nas Bože, još dugo u zdravlju pod ovim južnim suncem, pa makar i pocrnili ko kakva Arapčad... Tačno pred određeni sat pojaviše se na počasnoj tribini domaći i strani zastupnici aristokracije, supruga zajedničkog ministra finansija, preuzvišena Vilma pl. Kallaya sa svojom porodicom, poglavica zemaljske vlade za BiH preuvišeni baron Appel sa suprugom, građanski doglavnik preuzv. barun Kutsčerasa sa suprugom i još mnogi potomci drevnih predaka iz Monarhije".



## Održan Šesti međunarodni Kick boxing kup Ilidža open 2015

U okviru programa obilježavanja Dana Općine Ilidža u organizaciji Kick boxing akademije Ilidža i pod pokroviteljstvom Općine, 28. februara 2015. godine u Javnoj ustanovi Kulturno-sportski i rekreacioni centar Ilidža održan je tradicionalni Šesti međunarodni Kick boxing kup Ilidža open 2015. Na turniru je učestvovalo 400 boksera iz Hrvatske, Srbije, Crne Gore, Slovenije i Bosne i Hercegovine koji su se takmičili u konkurenciji kadeta, juniora i seniora u muškoj i ženskoj konkurenciji u kategorijama point fighting, light contact, kick light, full contact i low kick. Turnir je otvorio načelnik općine Ilidža prof. dr. Senaid Memić koji je učesnicima turnira zaželio dobrodošlicu na Ilidžu, lijepo druženje i mnogo uspjeha u takmičenju. U cjelodnevnom programu koji je privukao veliki broj ljubitelja ovog atraktivnog borilačkog sporta, viđeno je dosta interesantnih i atraktivnih mečeva. Takmičari Kick boxing akademije Ilidža osvojili su četiri zlatne, tri srebrne i jednu bronzanu medalje.

## Edin Sinanović prvi u Karlovcu

U Karlovcu je održan Evropski kup za juniore i seniore u kik-boksu na kojem je nastupilo 1.000 takmičara iz 20 zemalja. Član Kik-boxing akademije „Ilidža“ Edin Sinanović osvojio je zlatnu medalju u konkurenciji juniora do 60 kg.

„Zadovoljan sam nastupom i drago mi je da sam opravdao očekivanja trenera Nermina Bašovića koji je najzalužniji za moje uspjehe. Ova medalja mi je podstrek da budem još bolji“ kazao nam je Sinanović.



## Samira Musić i Tarik Bičo osvojili medalje

U dvorani SKPC „Mejdan“ u Tuzli 28. februara 2015. godine održano je međunarodno karate takmičenje XVI TK OPEN. Na turniru su prisustvovali takmičari iz Bosne i Hercegovine, Hrvatske, Srbije i Makedonije. Takmičari KK „Kapiten“ postigli su zapažene rezultate. Samira Musić osvojila je treće mjesto, a Tarik Bičo drugo mjesto.

## Još dvije Evropske medalje za Karate klub Champion Ena Gljiva i Anes Congo

Karate klub Champion, od svog osnivanja do danas navikao je svoje vjerne fanove na vrhunske rezultate, a već od 2006. godine pa na ovamo, postalo je rutina osvajati najsajjnija odličja na Evropskim prvenstvima. Ove godine, 42. Evropsko prvenstvo za kadete, juniore i U21 održano je u švicarskom Cirihiu, a Ena Gljiva i Anes Čongo pobrinuli su se da se tradicija Karate kluba Champion ne prekida. Anes Čongo i ove godine je osvojio Evropsku medalju. U kategoriji mlađih seniora (U21) do 75 kg, imao je 5 mečeva.

Zanimljivo je bilo i u kategoriji djevojaka, mlađih seniorki (U21) preko 68 kg, gdje je nastupala Ena Gljiva.

U prvom meču Ena je radila protiv reprezentativke Španije, koju je pobijedila rezultatom 10:3, a u narednom meču čekala ju je Slovenka. Meč sa Slovenkom završen je rezultatom 2:0. U meču za finale, radila je protiv reprezentativke Srbije, od koje je poražena rezultatom 5:0.

Za treće mjesto borila se sa reprezentativkom Luksemburga, koju je pobijedila 5:3 i tako osvojila svoju drugu Evropsku medalju u karijeri.



# MANIFESTACIJE POVODOM OBILJEŽAVANJA 12. MARTA DANA OPĆINE ILIDŽA

- ▶ 27.02.2015. godine/PETAK  
„SVEČANA SJEDNICA POVODOM 1. MARTA  
DANA NEZAVISNOSTI BIH“  
MULTIFUNKCIONALNA SALA OPĆINE  
ILIDŽA U 15:00 sati
- ▶ 28.02.2015. godine /SUBOTA  
VI INTERNACIONALNI KICK BOXING KUP  
„ILIDŽA OPEN 2015“  
JU KSiRC ILIDŽA, CJELODNEVNI PROGRAM  
OD 11:00 sati
- ▶ 7.03.2015. godine/SUBOTA  
„TURNIR U STOLNOM TENISU“  
PROSTORIJE MZ STUP U 11:00 sati
- ▶ 7.03.2015. godine/SUBOTA  
PREDSTAVA „POSEBAN SAM“  
MULTIMEDIJALNI CENTAR ILIDŽA  
U 18:00 sati
- ▶ 7 i 8.03.2015. godine/SUBOTA I NEDJELJA  
„10 OTVORENO PRVENSTVO U KARATEU ZA  
DJECU, KADETE I JUNIORE – ILIDŽA 2015“  
JU KSiRC ILIDŽA, CJELODNEVNI PROGRAM  
OD 10:00 sati
- ▶ 11.03.2015. godine/SRIJEDA  
„SVEČANO OTVARANJE PRODUŽENOG  
BORAVKA“  
DRUGA OSNOVNA ŠKOLA u 11:00 sati
- ▶ 12.03.2015. godine/ČETVRTAK  
„SVEČANA SJEDNICA POVODOM 12. MARTA  
DANA OPĆINE ILIDŽA“  
MULTIFUNKCIONALNA SALA OPĆINE  
ILIDŽA U 15:00 sati
- ▶ 12.03.2015. godine/ČETVRTAK  
„SRCE EKO TURIZMA“  
PLATO ISPRED OPĆINE ILIDŽA U 15:00 sati
- ▶ 14.03.2015. godine/SUBOTA  
„KONCERT DUHOVNE MUZIKE“  
MULTIMEDIJALNI CENTAR ILIDŽA  
U 20:00 sati
- ▶ 15.03.2015. godine/NEDJELJA  
„ŠAHOVSKI TURNIR“  
RESTORAN RVI ILIDŽA-BAZENI U 10:00 sati
- ▶ 15.03.2015. godine/NEDJELJA  
„BAJKA O ČAROBNOM SVIRAČU“  
MULTIMEDIJALNI CENTAR ILIDŽA  
U 13:00 sati
- ▶ 21.03.2015. godine/SUBOTA  
„VEČER FOLKLORA“  
MULTIMEDIJALNI CENTAR U 19:00 sati
- ▶ 22.03.2015. godine/NEDJELJA  
„DRAMSKA PREDSTAVA“  
DOM KULTURE BUTMIR U 19:00 sati
- ▶ 22.03.2015. godine/NEDJELJA  
„TURNIR U BOČANJU“  
PIJAČNA DO BR.72 u 11:sati
- ▶ 25-27.03.2015. godine  
„DANI OTVORENIH VRATA SPOMENIČKOG  
KOMPLEKSA RATNI TUNEL DB“  
Tuneli br.1 (Donji Kotorac),od 9:00-15:30 sati
- ▶ 27.03.2015. godine/PETAK  
„VEČER SEVDAHA“  
MULTIMEDIJALNI CENTAR U 19:30 sati
- ▶ 28.03.2015. godine /SUBOTA  
„DJECA PJEVAJU HITOVE“  
MULTIMEDIJALNI CENTAR ILIDŽA  
U 19:00 sati
- ▶ 29.03.2015. godine/NEDJELJA  
„VEČER POEZIJE“  
MULTIMEDIJALNI CENTAR ILIDŽA  
U 19:00 sati
- ▶ 02-05.04.2015. godine  
„3.BASKET KUP ILIDŽA 2015“  
JU KSiRC ILIDŽA U 10:00 sati